

Transkription von Stadtbucheintrag DAN 1388a

Ort, Datierung: Danzig, 1388-??-??

Signatur: Stadtarchiv Danzig, 300, C, 432

Inhalt: Fettkrämergilde: Zunftordnung

Jtem Jnt Erste wragte na borgerrecht /

Anno m ccc lxxxviiij /

Na unser heren anwysunge so sint / de oldesten mit den Iungesten to rade gewor/den mit egenem
willen vnd mit wolbe/dochtem mode dat se er dingk hebben / laten beschriuen gelik anderen werken /
vnd hebben eyne broke vnd(er) en gesettet / dar mede se sik mogen dwingen vnder / enander vn eren
Synt dem male nene / kompanye edder werk mach gehalten / werden sunder dwanyk /

Wer dar wert gefunden mit vnrechter / wicht edder mit vnrechter mate . se sy / cleyne edder grot . dat
solen de oldesten / bringen vor den Rath /

Eyn yderman sal stan bynnen deme / Renstene by der Stat wilkore dat is / eyn ferdingk //

Wer dar vorkofft by deme stene edder / by deme haluen stene . edder by deme / verndel de sal et
wegen laten yn der / Stat wagen . by eynem ferdinge kegen / deme werke /

Nymant sal my(n)ner mate hebben wen / eyne halue matte de man stryket /

Wen eyn broder edder eyne suster steruet / yn vnsem werke . Dat eyn yderman dat by sy by syner bote
also wen man / des morgens dat lyk to der kerken dregen / sal vnd de lichte vp heuen to dregen / to
der kerken wer dar denne nicht en / is den sal man panden vor vj penny(n)ghe / Vnd wer dar nicht en
is yn der kerken / wen man de lichte vp heuet vnd mede to / graue volget de sal ock geuen vj
pen(n)y(n)g(he) / Welk broder dar suluen heyme is de sal / suluen kamen to der bygraft Vnd ys / he
suluen nicht heyme So mach syne / bedderue vrouwe wol vor en komen //

Welk broder eynen anderen wil bringen / in vnse werk De sal dar to zeen dat / he vnse werkes werdich
sy vnd syne / bedderue vrouwe Weret sake dat de / man vnd ader ¹ de vrouwe de dat werk wynnet /
wedder ere gedan hedden er se dat werk . wönnen So solen se des werkes entberen / mitdeme manne de
se dar yn brenget ² /

Weme syne schalen werden befunden / dat se beslagen syn edder vnreyne syn / vnd gelike wol recht
syn wen se ghe/reyniget syn also menghen schillingk / also de schalen vnrechte wegen also manch /
halff p(unt) [?] wasses hefft de man gebroken / in dat werk /

Wer dat de Schalen den olderluden / vntrucket edder ouel handelt mit wor/den edder mit werken de
hefft gebraken / viij p(unt) [?] wasses in dat werk kegen ysliken / oldermanne //

Welkem broder edder suster boden wert / gesant von den olderluden vnd de ³ gebra/ken hebben de en solen nene fremde varende⁴ lude / mit en bringen yn de kumpanye by des / werkes broke . dat is iiij p(unt) [?] wasses /

Nymant sal syne mate verndel edder / halue verndel den gesten lyen vp deme / markede by j p(unt) wasses /

De dat bottere veyle hefft de en sall / nicht mer wen twe tonnen apen hebbe / vnd vth ysliker tonnen eynen stêke vp / eynen smalen brede wer dar mer / wen twe tonnen apen hefft de sal geuen / iiij p(unt) [?] wasses in dat werk /

Wer dar mer botter vth settet vp dat / vinster wen vth isliker tonnen eynen / stêk de sal geuen ij p(unt) [?] wasses in dat /werk //

Ock solen de wedewen dat hyr vor , vor=/lenet is mede holden gelik den mann ⁵ /

Ock solen se geuen ere fülle ⁶ wasgelt / dat is twe halue schotez /

Welkem broder van den Jnngesten tho / gesecht wert dat lik to dregen de sall / et nicht vorsumen by j p(unt) [?] wasses /

Also de broder gemenligk to samen komen / So sal eyn yderman bescheden wesen / nicht to kopslagen , edder mit nymanden / tho reken , edder messer yn dat werk / to dregen , edder eyn den anderen to vor=/tornen by viij p(unt) [?] wasses /

Wer dar nicht en kommet tor morgen/sprake de sal geuen j p(unt) [?] wasses Wer / dar queme er sick de kompanye schedet / de sall geuen eyn halff p(unt) [?] wasses //

Alle dusse vorgeschreuen saken sal eyn / yderman by der broke de hir vor sint / vorwillekôret holden weret sake dat / sick des yemant wegerde , deme sal / man syn werk nedder leggen mit des / Rades orloff So langhe beth he sick / berichtet vor eyn(e)t ⁷ mit deme werke /

Eyn yslick man sall syne lôde merken / mit synem merke by der bote dat is / eyn p(unt) [?] wasses /

Nymand sal my(n)ner wicht hebben / wenne eyn verndel von eyne(m) ponde /

Nymant sal anders hebben , men / eyn Runth strîck holt by j p(unt) wasses /

¹ **vnd** ist durchgestrichen und durch **ader** ersetzt.

² **mit deme manne de se dar yn brenget** durchgestrichen und mit latein. Randbemerkung versehen.

³ **vnd de** durchgestrichen.

⁴ **varende** durchgestrichen und durch **fremde** ersetzt.

⁵ schlecht lesbar: *mannes*) ?

⁶ *sülle* ? erster Buchstabe verschmiert.

⁷ *berichtet* durchgestrichen *vor eyn(e)t* schlecht lesbar übergeschrieben.